



**Les Fleurs Des Vies Des Saints Et Des Festes De Toute
L'Annee, Suivant L'Usage Du Calendrier Romain Reforme**

Augmentees des Saints & Bien-heureux Peres Iesuites, de Saint Charles
Borromeo, & de Sainte Françoise ; Avec le Martyrologe Romain, pour
tous les iours de l'Annee ...

Ribadeneyra, Pedro de

Paris, 1631

XXV La vie de saint Marc Euangeliste.

[urn:nbn:de:hbz:466:1-75749](https://nbn-resolving.org/urn:nbn:de:hbz:466:1-75749)

LA VIE DE SAINT MARC,
Euangeliste.

25.
AVR.



SAINT Marc Euangeliste & Martyr, estoit Hebreu de nation, & de la Tribu de Leui, selon quelques Autheurs, l'un des septante Disciples de nostre Seigneur Iesus-Christ, compagnon del' Apostre saint Pierre. Theophilacte, Eurhime, Dorothee, & les autres modernes, disent que c'est luy que saint Luc es Actes des Apostres appelle Iean surnommé Marc, fils de Marie, & cousin de l'Apostre saint Barnabé, lequel suiuit pour vn temps saint Paul, & saint Barnabé, & fut leur compagnon en la predication, à cause duquel ils se separerent eux deux. Neantmoins le plus certain est qu'il y en a deux de ce nom, l'un Iean Marc, cousin de saint Barnabé, l'autre saint Marc l'Euangeliste, duquel nous parlons icy, comme l'on peut recueillir de plusieurs graues Autheurs de saint Basile, de saint Isidore, des Epistres mesmes de saint Paul, comme le prouue le Cardinal Baronius, & les Peres Alphonse Salmeron, Robert Bellarmin, & Iean Maldonat de la compagnie de Iesus, gens doctes, & qui ont soigneusement escrit. Et cela se prouue, parce que le nom de l'Euangeliste, c'estoit Marc, & celuy de l'autre, Iean, qui fut surnommé Marc, comme le remarque Denys, Euesque de Corinthe. Le premier fut l'un des septante Disciples, non pas le second: l'un suiuit, & fut compagnon de saint Pierre, & l'autre de saint Paul. L'Euangeliste vint à Rome avec Pierre, escriuit son Euangile douze ou quinze ans apres l'Ascension de Iesus-Christ. L'autre suiuit saint Paul & saint Barnabé, dix-huit ans apres que nostre Seigneur fut monté aux Cieux, comme l'on void aux Actes des Apostres.

Donc saint Marc l'Euangeliste, duquel nous escriuons icy la vie, fut Disciple & mignon de saint Pierre, qui l'appelle en ses Epistres son trescher fils, lequel à cause de son grand esprit, & beau discours, il prit pour luy seruir d'interprete, & de declarer en plusieurs autres langues, ce qu'il disoit en la sienne, à ceux qui ne l'entendoient pas, & pour expliquer plus copieusement les profonds misteres qu'il preschoit en peu de paroles ce que saint Marc faisoit avec vn esprit admirable, & vn merueilleux don du Ciel. Et d'autant que les fideles qui estoient conuertis à Rome par la predication de saint Pierre (qui estoient en fort grand nombre) desirerent d'auoir par deuers eux ce qu'il leur auoit presché de la vie de I. Christ, ils prierent saint Marc de le coucher par escrit; lequel escriuit son Euangile, tout ainsi qu'il l'auoit entendu de saint Pierre. Le saint Apostre l'approuua, & la confirma de son autorité, commandant qu'elle fust leuë en l'Eglise. Cét Euangile dit saint Hierosime, est comme l'Euangile de Matthieu en forme d'abregé, parce que ce que saint Matthieu dit avec beaucoup de

paroles, saint Marc le raconte succinctement, encore que saint Marc die des choses qui ne trouuent point en saint Matthieu; & d'autres que saint Matthieu dit en passant, lesquelles sont rapportées bien au long dans saint Marc. Apres que saint Marc eut demeuré quelques années à Rome, & seruy de truchement à saint Pierre (comme nous auons dit) il print la benediction de son Pere & Maistre, & partit par son commandement pour aller en Egypte, portant avec soy son Euangile, lequel il alloit annoncer à ces nations barbares & superstitieuses, & y faire eclater les premiers rayons de la lumiere celeste, à ceux qui habitoient en l'ombre de la mort, deliurés de la cognoissance du vray Dieu, & de Iesus-Christ son Fils tres-benist. Il prescha l'Euangile en Cirene, en Pentapolis, & en quelques autres villes, où il fit grand fruit, illuminant, attirant à nostre sainte Foy vne grande multitude de d'idoles pour sa bonne vie & doctrine, & grands miracles que Dieu faisoit par luy. Il vint en Alexandrie, comme à la capitale ville de la Prouince, & qui auoit plus de besoin de ceste diuine lumiere: là il reluisoit comme vn nouveau Soleil, en vn lieu sombre & tenebreux. Il y bailla vne Eglise à nostre Seigneur, sous le nom de saint Pierre son maistre, qui estoit encore viuant. Cét pourquoy l'Eglise d'Alexandrie est patriarchale, & la premiere dignité apres celle de Rome, ainsi que l'affirme le Pape Gelase. Plusieurs se conuertirent à la Foy de Iesus-Christ, tant des Iuis qui habitoient en ces quartiers là, comme des Egyptiens, qui furent fort opiniastrés & superstitieux à maintenir leur fausse Religion, iusques à perdre plustost la vie, que de faillir d'vn seul point au seruire inutile de leurs dieux sales & ridicules.

L'exemple, les conseils, & la doctrine de saint Marc eurent tant d'efficace, que plusieurs furent conuertis par sa predication, qui s'en allerent peupler les montagnes, & les deserts d'Egypte, avec vne si grande sancteté, qu'ils sembloient plustost des Anges reuestus d'vn corps mortel, que des hommes. Ils renonçoient à toutes les choses du monde, fuyans les inuolutions & conuersations des hommes charnels, & viuoient par entr'eux en grande paix & conformité. Pas vn d'eux n'estoit pauvre, parce qu'on donnoit à vn chacun ce dont il auoit besoin: ny riche, d'autant que ceux qui l'estoient, bailloient leurs richesses pour subuenir aux autres, desirans seulement d'estre riches de ces biens qui rassasient, & contentent, & rendent leurs possesseurs bien-heureux. Leur humilité estoit grande, & leur modestie, leur silence, leur oraison, leur sçauoir es lettres diuines, la contemplation perpetuelle de Dieu, en laquelle ils estoient tellement englouris, qu'ils passoient tout le iour sans manger, iusques à ce que le Soleil fust couché, & lors ils prenoient leur refection d'vn peu de pain, & de sel: Les plus foibles & delicats s'abouisoient pour tous mets, l'herbe d'hyllope, & l'eau claire des fontaines. Les vns demouroient trois iours, les autres cinq & six sans manger, & lors qu'ils mangeoient, ils estoient plus forcez par la necessité du corps, que par le goust qu'ils eussent

25.
AVR.
fent peu prendre es viandes corruptibles: car leurs
ames estoient remplies, & tousiours affamées de
la nourriture du pain diuin. Leurs habits estoient
simples, & sans façon, seulement pour couvrir
& defendre le corps des iniures du temps, du
chaud, & du froid. Bref, la vie des bien-heureux
Disciples de saint Marc, estoit vn pourtraict du
Ciel, & vn modele de la vie que les saints Apo-
stres enseignerent & planterent en la primitive
Eglise, lors que tous les fidelles (comme dit saint
Luc) n'estoient par entr'eux qu'une ame & vn
cœur, & qu'on fournissoit à vn chacun ce dont il
auoit necessité. Cecy est descript bien au long par
Philon Iuif, qui viuoit en ce temps-là, Auteur si
grau & elegant, qu'on compare son style à celui
de Platon, lequel voyant ainsi florir l'Eglise d'A-
lexandrie, plantée par saint Marc, & ces deserts
d'Egypte couuerts en vn Paradis terrestre, il com-
posa vn liure en leur loiange, comme rapporte
Eusebe en son Histoire, saint Hierosme aussi
au liure des Auteurs Ecclesiastiques, quand il
parle de Philon. Et non seulement les hommes
vivoient en la lumiere que nous auons dite, mais
aussi plusieurs femmes, filles, ieunes, & vieilles,
lesquelles surmontant la foiblese feminine triom-
phoient de leur propre chair, & menoient vne vie
en tres-parfaicte chasteté, comme si elles n'eus-
sent point eu de corps, lequel elles auoient con-
sacré aussi bien que leurs ames à Dieu.

Les Gentils par trop chasteux, ne peurent souf-
frir l'esclair d'une si grande lumiere, laquelle les
aueugla, & conuertit la medecine en vn poison,
voyant que leur fausse Religion s'en alloit des-
criée, & que le seruice de leurs dieux ne se faisoit
plus: ils determinerent de faire mourir celui qui
taschoit & s'efforçoit de leur annoncer la vraie
vie; bref, de tuer saint Marc, comme destructeur
de leurs Temples, & ennemy de leurs dieux. Le
saint Euangeliste le sceut, & se prepara à tout ce
qui pourroit aduenir, & à ce que luy venant à
faillir, ses brebis ne demeurassent point sans Pas-
teur, & que le troupeau de nostre Seigneur ne
fust exposé à la gueule des loups, sans aucune de-
fense: il ordonna pour son successeur & Euesque
Anian; fit Male, Sabin, & Cedron Prestres, sept
autres Diacres, & onze Ministres, pour le seruice
de l'Eglise, lesquels il laissa en Alexandrie, & re-
uint à Pentapolis, où il auoit auparauant presché.
Il y demeura deux ans, confirmant en la Foy les
fidelles, leur donnant des Euesques, & des Pre-
stres, pour les gouverner & enseigner, & faisant
en tout office de vray Apolte & Pasteur. Apres
il retourna en Alexandrie, & trouua le nombre
des Chrestiens fort accru, dont il receut vne grã-
de ioye. Les Gentils citans aduertis de sa venue
voulurent executer ce qu'ils auoient long temps
auparauant determiné, le vingt-quatriesme d'A-
uul, qui estoit vn iour de Dimanche pour les Chre-
tiens, & pour les payens vne feste que les Egypti-
ens celebrent à leur Dieu Serapia, avec grande so-
lemnité. Ils trouuerent le saint Euangeliste qui
disoit Messe, lequel ils saisièrent, & luy mirent vne
corde au col, avec laquelle ils le trainerent par
les rues, & d'une grande violence & furie, de sor-

te qu'il estoit tout brisé de coups, qu'il choquoit
sur les pierres, & saignoit de tous les costez que
son saint corps estoit blessé. Le bien-heureux
saint Marc rendoit cependant graces à nostre
Seigneur, de ce qu'il le faisoit endurer pour luy.
On le traina ceste nuict là en prison pour consul-
ter de quelle mort ils le puniroient. Sur la minuict
les portes de la prison estans fermées, & les gardes
posées en sentinelle, la terre commença à trem-
bler: tout d'un coup il descédit vn Ange du Ciel,
lequel frappa saint Marc, & luy dit: Marc, serui-
teur de Dieu, vostre nom est escrit au liure de
vie, & vous estes compté au nôbre des Apostres,
& on aura à iamais memoire de vous: les Anges
receuront vostre esprit au Ciel, & les reliques de
vostre corps seront honorées en la terre. Alors le
Saint haussant les mains au Ciel, remercia nostre
Seigneur de ceste faueur, & le supplia humble-
ment de receuoir son ame en paix. Nostre Re-
dempteur Iesus-Christ, pour monstrier qu'il exau-
çoit son oraison, s'apparut en la mesme forme
qu'il auoit au monde, le salua doucement, & luy
dit: Marc, mon Euangeliste, la paix soit avec toy.
A quoy il respondit: La paix soit avec vous, mon
Seigneur Iesus-Christ. Le matin estant venu, ils
le tirerent hors de la prison, & de la mesme fierté
& barbarie que le iour de deuant, ils le trainerent
par des lieux rudes & raboteux, iusqu'à ce qu'il
eut rendu l'ame à Dieu. Les ministres de Sathan
voulotent faire brusler son corps saint, & com-
me ils tenoient desia le feu tout prest, il s'esleua
par la prouidence diuine vn subit tourbillon, &
vne si horrible & espouuanteable tempeste, entre-
meslée de tonnerres, d'esclairs, de pluye, & de
pierres, en forte qu'ils ne peurent executer leur
mauuaise intention: au contraire, plusieurs d'en-
tr'eux furent accablez, & beaucoup de maisons
renuersees. Les Chrestiens enleuerent le corps,
& le porterent chantans des Hymnes & des psal-
mes en vn lieu decent & honorable, d'où il fut
depuis amené en la ville de Venise, où il est reu-
éré dans vne magnifique Eglise que la Seigneurie
a fait bastir: ceste Republique ayant pris pour ses
armes le lyon de saint Marc, avec ces paroles:
Pax tibi Marce Euangelista meus: c'est à dire,
Paix à toy, Marc mon Euangeliste, & le nom de
saint Marc pour celui de la Republique; car au-
tant vaut à dire, Saint Marc ordonne ou com-
mande, que de dire, La Republique de Venise
commande.

Le martyre de S. Marc fut le vingt-cinquiesme
d'Auul, auquel l'Eglise celebre sa feste le huieti-
esme an de l'Empire de Neron, & le 64. de la Nati-
uité de Iesus-Christ, selon le Cardinal Baronius
& selon Onufre le 63.

Faut prendre garde qu'il y a des auteurs qui
ne mettent pas saint Marc martyr, d'autant que
saint Hierosme, Eusebe, & Isidore, parlans de
luy, ne disent pas qu'il ait esté: mais ce n'est pas
vn argument valable pour le nier, le Pape Gelase
le met entre les martyrs, au Decret qu'il fit des
liures authentiques & apocriphes. Nicephore au
liure second de son Histoire chapitre 43. Meta-
phrasse & Procope qui ont descript la vie l'affer-

25.
AVR.

ment, & apres eux Lipoman & Surlus, qui ont esté suiuis du Cardinal Baronius, & des Auteurs modernes qui ont escrit les vies des Saints. Le Martyrologe Romain le qualifie tel, & mesme l'Eglise Romaine le iour de saint Marc recite l'office des Apostres & Euangelistes au temps de Pasques, & les Antiphones des Martyrs. Ce mesme iour de saint Marc l'Eglise chante les grandes Litanies, qu'on appelle à la difference des autres plus petites, & on fait tous les ans vne Procession generale, pour rendre graces à nostre Seigneur en commun, de tous les bien-faits que nous auons receus de sa main, & le supplier qu'il nous les multiplie en santé, & nous donne les fruiets de la terre necessaire pour la vie humaine.

L'usage de ces Litanies est fort ancien & vité en l'Eglise Catholique, & saint Gregoire Pape en fait mention, comme estant tel, nous exhortant de le pratiquer avec deuotion comme l'on peut voir au commencement du second liure de son Registre.

Que si quelques Auteurs escriuent que saint Gregoire institua les grandes Litanies, ce n'est pas à dire qu'il ait esté le premier qui les a inuentées, mais parce qu'il ordonna que celles qui se faisoient auparauant, allassent dorenavant à l'Eglise de saint Pierre, comme c'est encore auourd'hui la coustume à Rome, quand la Procession va depuis S. Marc iusques à saint Pierre. Saint Hierosme fait mention de saint Marc en son Traitté des Hommes Illustres chapitre vingt-vn. Dorothee au liure de la vie des Prophetes, & des Apostres: Clement Alexandrin liure sixiesme Hypotyposeon: Eusebe en son Histoire liure 2. chapitre 16. & liure quatriesme chapitre 11. Irenee liure quatriesme chapitre 8. Nicephore liure 2. chapitre 43. Saint Isidore au liure de la vie des saints Peres, chapitre 85. Beda, Vsuard, & Adon en leurs Martyrologes.

En Alexandrie deceda S. Marc Euangeliste, lequel estât disciple, & comme Secretaire de saint Pierre Apostre, escriui l'Euangile à la requeste des Chrestiens qui estoient à Rome, & en prenant vne copie au ec soy, s'en alla en Egypte, où il prescha tout le premier la Foy de nostre Sauueur en la ville d'Alexandrie, & y bastit vne Eglise au nom & honneur de saint Pierre, & puis fut pris, lié avec des cordes, & trainé parmy des pierres & rochers, par lesquels il fut fort appressé, par apres serré en prison où les Anges le visiterent, nostre Sauueur mesme luy apparuisant, l'innuita au Royaume du Ciel. L'an huictiesme de l'Empire de Neron. A mesme iour on celebre à Rome en l'Eglise saint Pierre, les grandes Litanies, instituees par saint Gregoire Pape. A Saragoisse ville de Sicile moururent les saints martyrs, Euode, Hermogenes, & Caliste. En Antioche saint Estienne Euesque & martyr, lequel ayant esté long-temps affligé par les heretiques qui ne vouloient admettre le Concile de Calcedoine, fut en fin ietté dans le fleuve Orontes, sous l'Empereur Zenon. Au mesme lieu endurerent les Saints Philon & Agatopolis Diacres. A Bins en Haynaut saint Ermin Euesque & Confesseur.

LA VIE DE SAINCT CLETE,
Pape & Martyr.



SAINCT Clete Pape & martyr estoit natif de Rome, & de noble & ancienne famille, fils d'Emilien: saint Pierre le conuertit à la Foy, & le fit Euesque, l'ayant recogneu homme d'esprit, prudent, & zélé. Et d'autant que le saint Apostre estoit occupé à prescher, & enseigner le peuple, & en d'autres choses qui importoiert le gouuernement vniuersel de l'Eglise: ne pouuant vacquer à toutes les affaires qui se presentoiert, il print pour coadiuteur Lin pour la ville de Rome, & Clete pour le dehors, lesquels apres la mort de saint Pierre furent l'un apres l'autre Papes: Lin le premier, & Clete apres, lequel gouerna tres-sainctement l'Eglise sous l'Empire de Vespasian, & de son fils Tite, iusques à ce que Domitian succeda à l'Empire, qui fut tres-vicieux, cruel, & abominable Empereur en ses meeurs, & fort different de son pere Vespasian; & del' humeur de son frere Tite. Car outre les autres meschancetes par luy commises, il se fit appeller Dieu & Seigneur, & persecuta les Chrestiens qui ne le vouloient pas reconnoistre pour tel, & qui preschoient qu'il n'y auoit qu'un vray Dieu Createur du Ciel & de la terre.

En ceste persecution de Domitian (qui fut la deuxiesme que l'Eglise receut) saint Clete entre les autres fut couronné du martyre le vingt-sixiesme d'Auril, l'an de nostre Seigneur Iesus-Christ nonante trois, apres auoir demeuré dans le Siege Apostolique douze ans, sept mois & deux iours, selon Baronius, & selon le liure des Papes de Rome, douze ans vn mois & onze iours. Saint Clete suiuant l'ordre que luy auoit donné l'Apostre saint Pierre, distribua la ville de Rome en vingt-cinq paroisses, & mit en chacune d'icelles vn Prestre pour la gouerner, & administrer les Sacremens. Il fut le premier qui es lettres Apostoliques vfa de ces mots: *Salut & Benediction Apostolique*, desquels tous les autres Pontifes, à l'imitation de Clete, ont depuis vfe. Il fut enteré aupres de l'Apostre saint Pierre. L'Eglise celebre sa Feste le iour de son martyre.

LA VIE DE SAINCT MARCELIN,
Pape & Martyr.



MEsme iour vingt-sixiesme d'Auril, l'Eglise celebre aussi le Martyre de saint Marcelin Pape & martyr, lequel estoit natif de Rome, fils de Projecte: il succeda au Pontificat de saint Caliste, qui fut aussi pape & martyr, sous les Empereurs Diocletian & Maximian, auquel temps la dixiesme persecution s'esleua contre l'Eglise, qui fut la plus cruelle & sanglante de toutes. D'autant que les Chrestiens qui auoient eu quelque paix & repos, s'estoient tellement anochalez en la